

Pulau Penarik jadi kawasan rekreasi

Oleh Badrul Kamal Zakaria badrulkamal@bh.com.my



PESERTA dalam acara menangkap itik pada majlis perasmian Mini Karnival dan Laman Rekreasi Pulau Penarik di Tangkak, hari ini. - Foto Badrul Kamal Zakaria

TANGKAK: Dataran Pulau Penarik akan menjadi kawasan rekreasi terbaru yang bakal memanfaatkan penduduk setempat dan sekitar daerah ini. Timbalan Menteri Sumber Asli dan Alam Sekitar, Datuk Hamim Samuri, berkata projek itu dibangunkan oleh kerajaan menerusi Jabatan Pengairan dan Saliran (JPS) dalam usaha mensejahterakan rakyat di kawasan ini.

"Selain menjadi kawasan rekreasi kepada rakyat, kawasan ini juga akan menjadi pemangkin terhadap usaha menjaga ekosistem alam sekitar dan memupuk budaya cintakan alam sekitar, khususnya mencintai sungai ini.

"Sungai ini bukan hanya berfungsi sebagai sumber minuman atau pertanian tetapi sangat penting dalam kelestarian ekosistem hidupan lain.

"Malah, kita juga dapat mengambil manfaat dari sudut kesihatan menerusi acara sukan riadah," katanya pada majlis perasmian Mini Karnival dan Laman Rekreasi Pulau Penarik di sini, hari ini. Yang turut hadir, Ahli Dewan Undangan Negeri (ADUN) Bukit Gambir, Datuk M Asojan dan ADUN Serom, Abd Razak Minhat.

Pelbagai acara menarik turut diadakan sempena program terbabit seperti sukan air, pertandingan memasak, peraduan mewarna dan pameran pelbagai agensi kerajaan. Hamim yang juga Ahli

Parlimen Ledang berkata, sejumlah RM500,000 disediakan bagi membina pelbagai kemudahan termasuk jeti, wakaf dan kawasan siar kaki bagi kemudahan pengunjung.

"Kawasan ini juga dijangka dijadikan lokasi sukan ekstrem yang akan dibangunkan bersama Universiti Teknologi Malaysia (UTM) menerusi program Duta Jauhar oleh kerajaan negeri," katanya.

Selanjutnya di : <http://www.bharian.com.my/node/220198>